

आकाशवाणी

खबरां श्रुति खजूरिया कोला

1. प्रधानमंत्री नरेंद्र मोदी होरें पच्छिम एशिया च जारी संघर्ष पर राज्यसभा च भारत दा रूख साफ कीता।
2. सुप्रीम कोर्ट दा फैसला छड़े हिंदू, सिख जां फही बौद्ध धर्म दे व्यक्ति गै अनुसूचित जाति दा दर्जा पाने दा हकदार।
3. कृषि मंत्री होरें आखेआ जे केंद्र सरकार दे लगातार जत्तें कन्नै करसानें दी आमदन 8 गुणा तगर बदी ऐ।
4. असम, केरलम ते पुदुचेरी च विधानसभा चुनाएं आस्तै नामांकन पत्रें दी जांच अज्ज कीती गई।
5. कोलंबियाई सैन्य विमान हादसे च 66 लोकें दी मौत बचाव अभियान जारी।
6. बेलारूस दी आर्यना सबालेंका मायामी ओपन टेनिस टूर्नामेंट दे क्वार्टर फाइनल च।

<><><><><><>

PM-Rajyasabha

प्रधानमंत्री नरेन्द्र मोदी होरें पच्छिम एशिया क्षेत्र च शांति बहाल करने आस्तै संवाद ते कूटनीति दा समर्थन कीता ऐ। पच्छिम एशिया च जारी संघर्ष ते एहदे पर भारत दा रूख स्पष्ट करदे होई प्रधानमंत्री होरें राज्यसभा च आखेआ जे भारत नै तनाऽ घट्ट करने ते होर्मुज जलडमरूमध्य गी फही थमां खोलने दा मुद्दा ठोआया ऐ। उनें आखेआ जे पच्छिम एशिया च जारी संघर्ष त्रै हफ्तें थमां बह समें थमां चला'रदा ऐ ते एहदे कन्नै दुनिया भरै च गंभीर ऊर्जा संकट पैदा होई गेदा ऐ। श्री मोदी होरें आखेआ जे

भारत आस्तै बी एहू स्थिति चैंता दा विषे ऐ की जे इस संघर्ष करी बपार रस्ते प्रभावित होआ'रदे ना। उनें गलाया जे एहूदे नै पेट्रोल, डीजल, गैस ते उर्वरक जेही जरूरी चीजें दी नियमित आपूर्ति बाधित होआ'रदी ऐ। प्रधानमंत्री होरें आखेआ जे करीब इक्क करोड़ भारती खाड़ी देशें च रौहंदे ते कम्म करदे ना। उनें आखेआ जे उन्दे जीवन ते आजीविका गी सुरक्षा सुनिश्चित करना बी भारत आस्तै इक प्रमुख चिंता दा विषे ऐ। श्री मोदी होरें आखेआ जे बड़ी गिनतरी च विश्व भरै दे ज्हाज होर्मुज जलडमरूमध्य च फंसे दे न ते इनें ज्हाजें पर भारती चालक दल दे कई सदस्य सवार ना। प्रधानमंत्री नरेन्द्र मोदी होरें आखेआ ऐ जे पच्छिम एशिया च जारी संघर्ष दे बावजूद भारत च ऊर्जा सुरक्षा दा कोई संकट नेई ऐ। मोदी होरें कल लोकसभा च पञ्चम एशिया संघर्ष पर बयान दित्ता। इस मुद्दे पर भारत दा रुख स्पष्ट करदे होई श्री मोदी होरें आखेआ जे पूरे देश च पेट्रोल ते डीजल दी आपूर्ति सुचारू रूप कन्नै जारी ऐ। उनें आखेआ जे भारत कश 53 लक्ख मीट्रिक टन थमां बद्द महत्वपूर्ण पेट्रोलियम भंडार ऐ। श्री मोदी होरें सदन गी सूचित कीता जे 65 लक्ख मीट्रिक टन थमां बादू भंडारण दी बवस्था पर बी कम्म कीता जा'रदा ऐ। उनें आखेआ जे पिछले 11 ब'रे च देश दी शोधन क्षमता च खरा-मता बाद्दा होआ ऐ। प्रधानमंत्री होरें आखेआ जे सरकार बक्ख-बक्ख देशें दे आपूर्तिकर्ताएं कन्नै लगातार संपर्क च ऐ ते जित्थुं तगर संभव होग, स्रोतें थमां तेल ते गैस दी आपूर्ति जारी रखने दा प्रयास कीता जा'रदा ऐ। प्रधानमंत्री होरें आखेआ जे एहू संघर्ष त्रै हफ्तें थमां बद्द समें थमां चला करदा ऐ ते एहूदा वैश्विक अर्थव्यवस्था ते लोकें दे जीवन पर गंभीर प्रभाऽ पवा'रदा ऐ। उनें आखेआ जे मौजूदा स्थिति गी दिखदे होई दुनिया इस संघर्ष दे तौले हल आस्तै सब्बै पक्षें गी आग्रह करा'रदी ऐ। प्रधानमंत्री होरें आखेआ जे इस गंभीर स्थिति च देश ते विदेश च रौहने आहले भारतीयें दी सुरक्षा सरकार दी सर्वोच्च प्राथमिकता रेई ऐ। श्री मोदी होरें आखेआ जे संघर्ष दी शुरुआत कन्नै हुन तगर 3 लक्ख 75 ज्हार थमां मते भारती सुरक्षित रूप कन्नै देश परतोई चुके दे ना। उनें आखेआ जे हुनै तगर लगभग 1 ज्हार भारती ईरान थमां सुरक्षित वापस आई गेदे ना। प्रधानमंत्री मोदी होरें गलाया जे प्रभावित लोकें गी तुरत जानकारी प्रदान करने आस्तै भारत कन्नै होर प्रभावित देशें च चौबिस घंटे नियंत्रण कक्ष ते आपातकालीन हेल्पलाइन स्थापित कीती गेई ऐ। उनें आखेआ जे सरकार संवेदनशील, सतर्क ते हर संभव सहायता प्रदान करने

आस्तै पूरी चाल्ली तैयार ऐ। प्रधानमंत्री होरें आखेआ जे भारत अपनी एलपीजी दी 60 प्रतिशत लोड आयात करदा ऐ। उनें आखेआ जे आपूर्ति च अनिश्चितताएं करी सरकार नै घरेलू उपयोग आस्तै एलपीजी दी उपलब्धता सुनिश्चित करने दे कन्नोकन्नी एह्दे उत्पादन गी बदाने आस्तै बी कम्म कीता ऐ। प्रधानमंत्री मोदी होरें आखेआ जे मौजूदा संकट कन्नै दुनिया भर दी अर्थव्यवस्था प्रभावित होआ'रदी ऐ ते भारत च एह्दे प्रभाव गी घट्ट करने आस्तै लगातार प्रयास कीते जा'रदे ना। उनें आखेआ जे सरकार नै आयात ते निर्यात च आने आहली चुनौतियें दा आंकलन करने ते आवश्यक समाधानें पर कम्म करने आस्तै इक अंतर-मंत्रालयी समूह दा गठन कीता गेआ ऐ जेड़ा हर रोज बैठक करदा ऐ। प्रधानमंत्री होरें आखेआ जे देश दे करसानें एह् सुनिश्चित कीता ऐ जे देश दा खाद्य भंडार पर्याप्त मात्रा च होऐ। उनें गलाया जे इस मौसम च उचित बोआई सुनिश्चित करने दे बी प्रयास कीते जा'रदे ना।

<><><><><><>

Israili-Strike

ईरान दे इस्लामिक रिवोल्यूशनरी गार्ड कोर नै आखेआ ऐ जे उन्नै अज्ज बड्डुलै आप्रेशन टू प्रामिस फोर दे तैहत इजराइल ते अमरीका दे ठकानें पर जवाबी हमले कीते ना। नमें हमले च इलैत, दिमोना ते उत्तरी तल अवीव च इजराइल दे ठकानें ते क्षेत्र च केई अमरीकी सैन्य ठकानें गी नशाना बनाया गेआ। ईरान दे खातम अल अनबिया केंद्री मुख्यालय दे प्रवक्ता नै फारस दी खाड़ी च बरूदी सुरंग बछाने दे ईरान दे अभियान दा खंडन कीता ऐ। उनें आखेआ जे ईरान होमुर्ज जलडमरूमध्य ते आले दोआले दे जल क्षेत्रें पर पूरा नियंत्रण बनाइये रक्खे दा ऐ ते उसी बरूदी सुरंगा बछाने दी कोई लोड नेई ऐ।

<><><><><><>

DM Review Sec. Devp

रक्षा मंत्री राजनाथ सिंह होरें अज्ज वैश्विक ते क्षेत्रीय सुरक्षा कन्नै जुडे दे हाल दे घटनाक्रम दे मद्देनजर इक उच्च स्तरीय समीक्षा बैठक दी अध्यक्षता कीती। एह् समीक्षा ऐसे समें च जारी संघर्ष चौथे हफ्ते च प्रवेश करी चुके दा ऐ। इस संघर्ष कन्नै वैश्विक बपार मार्ग, खासतौर पर होमुर्ज जलडमरूमध्य कन्नै

होइए लंगघने आहले रस्ते बुरी चाल्ली प्रभावित होए ना। इस बैठक च रक्षा प्रमुख जनरल अनिल चौहान, वायु सेना प्रमुख अमरप्रीत सिंह, सेना प्रमुख जनरल उपेंद्र द्विवेदी ते नौसेना प्रमुख एडमिरल दिनेश के त्रिपाठी मौजूद हे।

<><><><><><>

Trump

तोआई, अमरीका दे राष्ट्रपति डॉनल्ड ट्रम्प होरें होमुर्ज जलडमरू मध्य गी परतियै खोलने लेई ईरान गी दित्ती गेदी समें-सीमा गी 5 दिनें लेई बदाई दित्ता ऐ। ट्रम्प होरें आखेआ कि अमरीका 5 दिनें तगर बिजली संयंत्रें पर हमले नेई करोग। सोशल मीडिया पर इस बारै घोशणा करदे होई ट्रम्प होरें आखेआ कि अमरीका ते ईरान दे अधिकारिणं बश्कार हाल च होई दी गल्लबात सकारात्मक रेही। उनें भरोसा जताया कि एह्दे नै इस संघर्श दा पूरा हल निकली सकदा ऐ। उनें आखेआ कि ईरान दे बिजली संयंत्रें पर हमले दी धमकी गी अगडे पाने दा कारण बैठकें ते चर्चाएं दी कामयाबी ऐ।

<><><><><><>

SC-Status

सुप्रीम कोर्ट नै फैसला सनाया ऐ जे छड्डा हिंदू, सिख जां बौद्ध धम्म दे अनुयायी गै अनुसूचित जाति दा दर्जा पाने दे पात्र ना। न्यायालय नै साफ कीता ऐ जे कुसै होर धर्म जियां जे इसाई धर्म च धर्मांतरन करने कन्नै अनुसूचित जाति दा दर्जा फौरी ते पूरी चाल्ली कन्नै खत्म होई जंदा ऐ। आंध्र प्रदेश उच्च न्यायालय दे इक आदेश गी बरकरार रखदे होई न्यायालय नै आखेआ ऐ जे इक बारी कोई व्यक्ति इसाई धर्म अपनाई लेंदा ऐ ते सक्रिय तौर पर उस धर्म दा पालन करदा ऐतां उसी अनुसूचित जाति दा सदस्य नेई मन्नेआ जाई सकदा। न्यायमूर्ति पी.के मिश्रा ते न्यायामूर्ति मनमोहन दी पीठ नै फैसला सनाया जे इसाई धर्म अपनाने आहला दलित व्यक्ति अनुसूचित जाति ते अनुसूचित जनजाति अधिनियम दे तैहत संरक्षण दा दावा नेई करी सकदा। न्यायालय नै इस गल्ला पर जोर दित्ता ऐ जे एह

स्थिति संविधान आदेश 1950 दे तैहत साफतौर पर स्थापित ऐ। अदालतै मूजब 1950 दे आदेश दे खंड 3 तैहत लाया गेदा प्रतिबंध बाध्यकारी ऐ। एहदे तैहत कोई बी व्यक्ति जेड़ा हिंदू धर्म, सिख या होर धर्म दा पालन करदा ऐ ओह अनुसूचित जाति दा सदस्य होने दी योग्यता मुहाई दिंदा ऐ।

<><><><><><>

Shivraj Farmer's Income

केंद्री राई-बाई मंत्री शिवराज सिंह चौहान होरें आखेआ ऐ जे देश दे करसानें दी आमदनी, केंद्र सरकार आसेआ कीती गेदी टिकाउ कोशिशें दे कारण खरी मती बदी ऐ। लोकसभा च प्रश्नकाल दरान अपने परते च चौहान होरें आखेआ जे करसानें दी आमदन सिर्फ दोगुणी नेई सगुआं किश मामलें च त्रै गुणा ते 8 गुणा बी बदी ऐ। उनें दस्सेआ जे अनाज दी पैदावार देश च 2014 थमां 44 फीसदी बदी ऐ।

<><><><><><>

Vaishnav Railway Reforms

केंद्री रेल मंत्री अश्विनी वैश्रणव होरें अज्ज भारती रेलवे च 5 सुधारें दी घोशणा कीती। भारती रेलवे नै इस बरे नमीं दिल्ली च 52 हफ्तें च 52 सुधार आहनेने दा धेइया कीते दा ऐ। नमीं दिल्ली च मीडिया गी जानकारी दिंदे होई मंत्री होरें टिकट रद्द करने, पैसा रिफंड करने दे नियम, नमक दी हुआई, गड्डिणं दी हुआई ते निर्माण दी गुणवत्ता सरबंधत सुधारें दी घोशणा कीती। वैश्रणव होरें टिकट रद्द करने ते पैसा रिफंड करने दे नियमें च सुधारें बारै दस्सेआ जे ट्रेन दी जातरा दे 72 घंटे कोला पैहले रद्द कीती गेदी टिकट पर सिर्फ घट्टोघट्ट फ्लैट कैंसलेशन शुल्क लगगोग। उनें दस्सेआ जे 72 घंटे कोला घट्ट समें पर टिकट रद्द या 24 घंटे पैहले टिकट रद्द पर 25 फीसदी किराया कैंसलेशन शुल्क दे तौरा पर लैता गेआ।

<><><><><><>

LS-Fin Bill Discussion

लोकसभा च वित्त विधेयक पर चर्चा दोबारा शुरू कीती गई। एह विधेयक वित्तीय बरे 2026-27 आस्तै केंद्र सरकार दे वित्तीय प्रस्तावें गी प्रभाव देने आस्तै ऐ। केंद्री खजाना मंत्री निर्मला सीतारमण होरें कल एह विधेयक सदन च पेश कीता हा।

<><><><><><>

Assembly Prep

27 मार्च थवां जम्मू-कश्मीर विधानसभा दा दुआ गेड़ शुरु होआ'रदा ऐ। एदे लेई तयारियां जोरे-शोरें कन्नै जारी ना। अधिकारिक कैलैन्डर मूजब अखराजातें सरबंधी बिल उस दिन पेश कीते जाने दी मेद ऐ। विधानसभा दी कारवाई गी रमज़ान आहले म्हीनें दे मद्देनजर अगड़ा पाई दिता गेआ हा। जम्मू विधानसभा दी कारवाई गी सूचारु ढंगै सिर चलाने लेई लोड़चदे सुरक्षा सनें होर दुए बंदोबस्त कीते जा'रदे ना।

<><><><><><>

Assembly Polls Nomination

असम, केरलम ते पुदुचेरी विधानसभा चुनांऽ आस्तै नामांकन पत्रें दी जांच अज्ज कीती गई। नामांकन प्रक्रिया कल सम्पन्न होई गई ही। मेदवार जेकर चाहन तां फ्ही वीरवार तगर अपना नांऽ वापस परताई सकदे ना। इक्के गेड़ च 2 राज्यें ते केंद्र शासित प्रदेशें लेई चुनांऽ अगले म्हीने दी 9 तरीक गी होडन। वोटें दी गिनतरी 4 मई गी कीती जाह्ग। तोआई, केरलम च नामांकन प्रक्रिया सम्पन्न होई गई जेदे मगरा चुनांऽ प्रचार तेज होई गेआ ऐ। इस्सै चाल्ली असम च सियासी गतिविधियां तेज होई गेइयां ना।

<><><><><><>

WB-Peaceful

पच्छिम बंगाल च आजाद, निरपक्ख ते शांतिपूर्ण चुनांऽ यकीनी करोआने लेई सी.एफ.पी.एफ, सशस्त्र बल ते आई.आर.बी दियां इक ज्हार 920 कंपनियां लाइयां गेइयां ना। 31 मार्च तगर सी.ए.पी.एफ दियां 300 कंपनियां पुज्जा'रदियां ना।

<><><><><><>

Jitender Space JK

जम्मू-कश्मीर च हाड- लास-पस्सियां पौने ते जंगलें च लग्गने आहली अगग सनें आपदा दी निगरानी ते नुक्सान दा आकलन करने लेई अंतरिक्ष तकनीक दा सक्रिय तौरा पर इस्तेमाल कीता जा'रदा ऐ। ISRO ने जम्मू-कश्मीर जंगलात मैहकमे आस्तै भू-स्थानिक तकनीक दा इस्तेमाल करदे होई जंगलें च अगग लग्गने दी सूचना देने लेई इक बशेश मोबाईल ऐप्लीकेशन ते डैशबोर्ड बी विकसित कीता ऐ। विज्ञान ते प्रोद्योगिकी ते पृथ्वी विज्ञान दे केन्द्रीय राज्यमंत्री डाक्टर जितेन्द्र सिंह होरें राज्यसभा च इक सोआले दे लिखित परते च एह जानकारी दिती। उ'नें दस्सेआ जे जम्मू दी केन्द्रीय युनिवर्सिटी च ISRO दा सतीश धवन अंतरिक्ष विज्ञान केन्द्र विद्यार्थियें गी अंतरिक्ष प्रोद्योगिकी सरबंधी परियोजनाएं पर कम्म करने दा तर्जुबा उपलब्ध करा'रदी ऐ।

<><><><><><>

Devotees Katra

पवित्तर श्री माता वैष्णो देवी जी दी गुफा च जारी "नवरात्रि उत्सव" दौरान श्रद्धालुएं दी गिनतरी च बड़ा मता बाह्वा दिक्खने गी लब्बा रदा ऐ ते पैहले 6 दिनें च तकरीबन 2 लक्ख शा मते श्रद्धालुएं उत्थें पूजा-अर्चना कीती। अधिकारियें दस्सेआ जे सख्त सुरक्षा- भीड़ प्रबंधन- साफ-सफाई ते मैडिकल स्हूलतें दी बढौलत भारी भीड़ दे बावजूद यात्रा सुचारु ढंगै कन्नै चला'रदी ऐ। कटरा आधार शिविर ते भवन

जाने आहला ट्रैक पूरे दिन मसरुफ रौहन्दा ऐ। अधिकारियें श्रद्धालुएं गी गुजारिश कीती ऐ जे ओह रस्ते च सुरक्षित ते बवस्थित आओ-जाई यकीनी बनाने लेई दिशा-निर्देशें दी पालमा करना।

<><><><><><>

Columbia Plane Clash

कोलंबिया च 128 लोकें गी लेइयै जा'रदा इक सैन्य परिवहन विमान कल प्यूर्टो लेगुइजामो सोयां डोआरी भरने दे मगरा फौरन हादसे दा शिकार होई गेआ। एहदे च 66 लोकें दी मौत होई गई ते केई होर घाऽल होई गए न।

<><><><><><>

TB

अज्ज विश्व क्षय रोग दिवस ऐ। क्षय रोग दी रोकथाम ते एहदे प्रति जागरूकता बदाने आस्तै एह दिन मनाया जंदा ऐ। डॉक्टरें, साईसदानें ते शोधकर्ताएं क्षय रोग खिलाफ शुरूआती इलाज दे महत्व दा जिक्र कीता ऐ। अखिल भारती आयुर्विज्ञान संस्थान, नमी दिल्ली च पल्मोनरी, क्रिटिकल केयर ते स्लिप मेडिसिन विभाग दे प्रोफेसर ते विभागाध्यक्ष डॉ. अनंत मोहन होरें आखेआ जे राश्ट्री क्षय रोग उन्मूलन कार्यक्रम मुख् च टी.बी खिलाफ अभियान गी मजबूती प्रदान करारदा ऐ। उनें आखेआ जे इस कार्यक्रम दा मकसद अगले 10 थमां 15 बरें च टी.बी दे मामले गी चरणबद्द ढंगै कन्नै घट्ट करना ऐ।

<><><><><><>

NIA- Searches

राश्ट्रीय जांच एजेंसी NIA नै जम्मू-कश्मीर दी केई सारी थाहरें पर छापेमारी कीती। एह छापेमारी दिल्ली लाल किले कश होए दे धमाके आहले मामले च कीती गई। एह छापेमारी जम्मू- श्रीनगर- बारामुला- कुलगाम- गांधरबल ते हंदवाडा जिले दी 9 थाहरें पर होई। तपाशी दौरान केई सारे

डिजिटल उपकरण जांच लेई जब्त कीते गए। एजेंसी दा आखना ऐ जे इस मामले च अजे तगर 11 आरोपियें गी गिरफ्तार कीता गेआ ऐ। जांच दौरान पता लग्गा जे उमर उन नबी जेड़ा धमाके च मारेआ गेआ हा ओह मुख साजिशकर्ता हा ते एदे च हिरासत च लैते गेदे ते होर दुएं ओदी मदद-कारवाई गी अंजाम दोआने च कीती। एजेंसी नै आखेआ ऐ जे बड़ी साजिश दा पता लाने लेई जत्त कीते जा”रदे ना।

<><><><><><>

Sanasar Tulip Garden

पिच्छले हफ्ते श्रीनगर च एशिया दे सारें शा बड़े ट्यूलिप गार्डन दे उदघाटन दे मगरा, रामबन जिले दी सनासर घाटी च जम्मू दा पैहला ते सारें शा बड़ा ट्यूलिप गार्डन बी कल 25 मार्च गी आम लोकें लेई खोली दिता जाग-जेहदे कन्नै इस खित्तें च सैलसफा गी बढावा थ्होग। स्हाड़े जिला संवाददाता नै जानकारी दिती ऐ जे 35 कनाल दे फैले ते इस बाग च 25 किस्में दे तकरीबन 2 लक्ख शा मते फुल्ल लाए गेदे ना। फुल्लें दी काशत सरबंधी मैहकमे नै बाग दी दिक्ख-रिक्ख लेई सबभै लोड़चदे इंतजाम करी लैते’देन। ट्यूलिप दे कन्नै-कन्नै सैलानी डैफोडिल्स जलकुम्भी- गुलाब ते होर दुएं फुल्लें दा नंद लेई सकगंन।

<><><><><><>

Aadhar Biometric Drive

जम्मू-कश्मीर च भारतीय विशेष पंछान प्राधिकरण (UIDAI) नै सूचना प्रौद्योगिकी विभाग ते समग्र शिक्षा दे सैहयोग कन्नै मेगा आधार लाजमी बायोमेट्रिक अपडेट अभियान 2.0 शुरु कीता ऐ। आकाशवाणी जम्मू संवाददाता दे मुजब स्याले आहले जोन दे स्कूलें च एह अभियान शुरु होई गेआ ऐ ते इक अप्रैल थमां सोए आहली जोन दे स्कूलें च बी शुरु होई जाग। एहदे तैहत 2 ज्हार 382 स्कूलें गी कवर कीता जाग ते 2 लक्ख शा मते विद्यार्थियें गी फायदा पुज्जोग। इस पैहलकमदी दा मकसद बक्ख-बक्ख सरकारी योजनाएं- वजीफें ते होरनें सेवाएं दे तैहत लाऽ हासल करदे बेल्लै बिना रुकावट

प्रमाणीकरण गी यकीनी बनाना ऐ। अभिभावकें गी गुजारिश कीती गेई ऐ जे ओह अपडेट कार्यक्रम लेई स्कूलें दे सम्पर्क च रौहन।

<><><><><><>

Miami Open Tennis

बेलारूस दी आर्यना सबालेंका मायामी ओपन टेनिस टूर्नामेंट दे क्वार्टर फाइनल च पुज्जी गेई ऐ। प्री-क्वार्टर फाइनल च उनें चीन दी झेंग किनवेन गी हराया। सबालेंका दा अगला मुकाबला अमरीका दी होली बैपटिस्ट कन्नै होग।

<><><><><><>

IMD-Weather

भारती मौसम विभाग नै अगले दऊं दिनें आस्तै केरलम ते माहे च गर्म ते चिपचिपे मौसम दी मेद जताई ऐ। आंध्र प्रदेश, मराठवाडा, अंदरले कर्नाटक, तटीय कर्नाटक, मध्य महाराष्ट्र, उप हिमालयी पच्छिम बंगाल, सिक्किम ते उत्तर पूर्वी राज्य च कल तोड़ी गरज कन्नै छिट्टे ते हल्की बिजली कड़कने दी पेशनगोई कीती गेई ऐ।

<><><><><><>